

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 18, 31. oktober 1996-imeersumi §§ 5, 8, aamma 10, § 10a-mi imm. 1, § 13, imm. 2, §§ 23, 25, aamma 26, § 33-mi, imm. 2 aamma § 34, imm. 3, kingullermillu Inatsisartut inatsisaatigut nr. 28, 28. november 2016-imeersukkut allanngortinneqartoq naapertorlugit aalajangersarneqarpoq:

Atuuffia

§ 1. Nalunaarut una Kalaallit Nunaata aalisarnikkut oqartussaaffigisaani kapisilinniarnermut (Salmo salar) atuuppoq:

- 1) Nunap Isuata kitaani NAFO-p sumiiffilersuiffiani 1. Tunngaviusumik killigititami 40 sømilit avataanni kapisilinniarneq inerteqqutaavoq.
- 2) Kalaallit Nunaata Tunumi aalisarfiani. Taamaattorli paragraffit tulliuttut kisimik atuutissapput, tassalu: § 6, § 7, § 8, § 9, § 10, § 11, § 12, § 13, § 14, § 15 aamma § 16. Tunngaviusumik killigititami 12 sømilit avataani kapisilinniarneq inerteqqutaavoq.
- 3) Kapisillit kuuani eqqaanilu tatsinilu tassunga atasuni kapisilinniarnermi.

Nassuiaatit

§ 2. Nalunaarummi matumani Inuussutissarsiutigalugu aalisarneq paasineqassaaq pisat tamaasa ilaannaasaluunniit tuniniarnissaat siunertaralugu aalisarnertut.

Imm. 2. Inuussutissarsiummut atatinagu kapisilinniarneq nalunaarummi matumani paasineqassaaq nammineq atugassanik kapisilinniarnertut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarnissamut akuersisummik allagartaqartunit toqqaannartumik pisineq tigusinerlu.

Imm. 4. Pisaqannginneq nalunaarummi matumani paasineqassaaq qassutit oqimmersalluunniit atorlugit kapisilinniarneq, tassani kapisilinnik pisaqartoqarani.

Inuussutissarsiutigalugu kapisilinniarnermut piumasaqaatit

§ 3. Inuussutissarsiutigalugu kapisilinniarnissamut akuersisummik allagartallit kisimik nalunaarutip atuuffigisaani pisarineqarsimasunik kapisilinnik tuniniaasinnaatitaapput.

§ 4. Inuussutissarsiutigalugu kapisilinniarsinnaanermut allagartat akuersissutit qinnuteqareermermi Aalisarnermut Piniarnermullu Naalakkersuisoqarfimmit tunniunneqartut piumasaqaataapput.

Imm. 2. Aalisarsinnaanermut akuersissut qinnuteqartunut piumasaqaatinik makkuninnga naammassinnittunut taamaallaat tunniussisoqarsinnaavoq:

- 1) Qinnuteqartoq inuiaqatigiinnut kalaallinut aalajangersimasumik attuumassuteqartuussaaq, aalisarneq pillugu Inatsisartut inatsisaanni § 3-mi, imm. 4 naapertorlugu.
- 2) Qinnuteqartup inuussutissarsiutigalugu aalisarsinnaanermut piumasaqaatit Inatsisartut aalisarneq pillugu inatsisaat § 6, imm. 3, naapertorlugu naammassisimassavai.
- 3) Qinnuteqartup qassutit kapisilinniutit aamma angallat kapisilinniut 12,8 meterit (42 fod) tikillugu tamakkerlugu takissusilik nammineq pigisaqarnissaa.
- 4) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik qinnuteqartoq ilisimatitsissaaq.
- 5) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq pillugu § 9 aamma § 16 naapertorlugu naammassinnissimassapput.

Inuussutissarsiutigalugu kapisilinniarnermi piniutit

§ 5. Uku taamaallaat atorlugit inuussutissarsiutigalugu kapisilinniartoqarsinnaavoq:

- 1) qarsorsat, imaluunniit
- 2) qassutit 20-t tikillugit tasillugit minnerpaamik 140 mm-inik nigartallit atorlugit aamma taakkunanit amerlanerpaamik qassutit 5-t imminnut qilersimasinnaapput.

Imm. 2. Qassutit nigartaat uuttorneqassapput uuttuutit $\frac{1}{2}$ kilomik oqimaalutserlugu nigartamut ikkunneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi, nr. 2-mi piumasaqaat eqqortissavaat.

Imm. 3. Atortut atorneqartut tamarmik piginnittup aqqanik imaluunniit taassuma angallataata aqqanik normuanillu nalunaaqutsersugaassapput. Nalunaaqutsiussat imermit arrortinneqarsinnaassanngillat.

Imm. 4. Qassutit kapisilinniutit silap pissusaata taamaattoqartissinnaappagu ullut tamaasa qassusiarfigineqartassapput, taamaalilluni aalisakkat atorneqarsinnaanerit ajornerulersinneqassanani.

Imm. 5. Qassutit imatut inissinneqassapput kangerliumanernik, ikerasannik kuunnillu assiisinnaagit imatullu isumannaatsumik sumiiffimmi sumiissusersiornissaaq angallammillu ingerlaarnissarlu ajoqusissanagu.

Imm. 6. Qassutit kapisilinniutit minnerpaamik 30 meterimik imminnut ungasitsigissapput.

Imm. 7. Qassutit kuup tininnerpaaffiani kuup paavanit minnerpaamik 500 meterimik ungasitsigisumut inissinneqassapput.

Inuussutissarsiutigalugu kapisilinniarnernup aaqqissuussaanera

§ 6. Inuussutissarsiutigalugu kapisilinniarneq pisassiissutit aallaavigalugit nunami tunitsivinnut tunisassanik imaluunniit najukkani kalaalimineerniarfinnut najukkamilu suliffeqarfinnut tuniniarneqartussanik aalisarnertut ingerlanneqarsinnaavoq.

§ 7. Naalakkersuisut Kalaallit Nunaanni inuussutissarsiuṭigalugu kapisilinniarnermi kapisilinnik uku mianeralugit pisassiissuṭit ukiut tamaasa aalajangertassavaat:

- 1) nunat tamat akornanni isumaqatigiissuṭit, kapisileqassuseq pigiinnarniarlugu amerliartoqqinnissaannullu siunertaralugu isumaqatigiissutaasut,
- 2) biologit siunnersuinerat,
- 3) atuisut ilisimasaat,
- 4) Aalisarneq pillugu Siunnersuisoqatigiinni ilaasortanut kommuninillu tusarniaaneq.

Imm. 2. Naalakkersuisut KNAPK-lu isumasioqatigereerlugu inuussutissarsiuṭigalugu kapisilinniarmissamut ulloq aallartiffissaq aalajangertassavaat. Ulloq aallartiffissaq, pisassiissuṭinik aalajangiineq tamassumunngalu piumasaqaatit pillugit nalunaarut www.naalakkersuisut.gl tusagassiutitigullu avammut nalunaarutigineqartassaaq.

Imm. 3. Aalisarneq ulloq imm. 2-mi taaneqartoq sioqqullugu aallartissanngilaq.

Imm. 4. Inuussutissarsiuṭigalugu kapisilinniarnermit pisat Kalaallit Nunaata avataani taamaallaat pisiariortorneqarsinnaapput tuniniarneqarsinnaallutillu Naalakkersuisut akuersissuteqarnerisigut.

§ 8. Pisassiissuṭit tamakkerlugit pisarineqarnissaaṭ qanillippat, Aalisarnermut Piniarnermullu Naalakkersuisoqarfiup nalunaarutigissavaa, qaqugu inuussutissarsiuṭigalugu kapisilinniarneq kiisalu taamatut aalisarnermit pisanik pisineq aamma tunisineq unissanersoq. Nuna tamakkerlugu tusagassiutit aqqutigalugit nalunaarutigineqassaaq. Aalisarnermi atortut aalisarnerup unitsinneqarnissaa sioqqullugu qaqinneqassapput.

Inuussutissarsiuṭigalugu kapisilinniarnermit pisanik nalunaaruteqarneq

§ 9. Kapisillit pisarineqartut tamarmik Kalaallit Nunaanni Aalisarnermik Akuersissuṭinik Nakkutilliisoqarfimmut (KANUAANA) erngertumik nalunaarutigineqartassapput.

Imm. 2. Inuussutissarsiuṭigalugu aalisarnissamut akuersissuṭillit kalaalimineerniarfinni toqqaanaq tunisisartut kapisilinnik tulaassinerit tamaasa nalunaaruteqartassapput. Nalunaaruteqarnermi kapisillit pisat tulaanneqartut tamarmik ilaatinneqassapput. Nalunaaruteqarneq ilanngussaq 1 naapertorlugu paasissuṭissanik tamanik imaqaassaaq aamma tamanna Sullissivik.gl aqqutigalugu imaluunniit KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl-mut nalunaaruteqarnikkut.

Inuussutissarsiuṭiginagu kapisilinniarnermut piumasaqaatit

§ 10. Inuussutissarsiuṭiginagu kapisilinniarmissamut akuersissuṭ qinnuteqareernikkut Naalakkersuisunit tunniunneqartassaaq.

Imm. 2. Imm. 1 malillugu qinnuteqartunut piumasaqaatinik makkuninnga naammassinnittunut taamaallaat akuersissuṭinik tunniussisoqarsinnaavoq:

- 1) Aalisarneq pillugu Inatsisartut Inatsisaanni § 8-mi, imm. 1-imi piumasaqaatinik naammassinnissimasut.
- 2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq § 15 aamma § 16 naapertorlugit naammassinnissimasunut.

Inuussutissarsiutiginagu kapisilinniarnermi piniutit

§ 11. Uku taamaallaat atorlugit inuussutissarsiutiginagu kapisilinniartoqarsinnaavoq:

1) qarsorsat, imaluunniit

2) qassutit (ataatsit) 2000-nik qilernillit, taakkua tasillugit nigartaat minnerpaamik 140 mm-iusut.

Imm. 2. Qassutit nigartaat uuttorneqassapput uuttuutit ½ kilomik oqimaalutserlugu nigartamut ikkuneratigut nakkartinneqatigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi, nr. 2-mi piumasaaqat eqqortissavaat.

Imm. 3. Qassutit piginnittup atii tamaasa ilanngullugit nalunaaqutsigaassapput. Nalunaaqutsiussat imermit arrortinneqarsinnaassanngillat.

Imm. 4. Qassutit kapisilinniutit silap pissusaata taamaattoqartissinnaappagu ullut tamaasa qassusiarfigineqartassapput, taamaalilluni aalisakkat atorineqarsinnaanerit ajornerulersinneqassanani sumiiffimmilu mingutsitsisoqassanani.

Imm. 5. Qassutit imatut inissinneqassapput kangerliumanerit ikit kuullu asserneqassanatik, imatullu qassutit sumiiffimmi sumiissusissiornermut/angallammik ingerlanerit ajoqutaassanatik.

Imm. 6. Kapisilinniarnermi qassutit imminnut minnerpaamik 30 meterimik ungasissuseqassapput.

Imm. 7. Qassutit tininnerpaaffiani kuup paavanit minnerpaamik 500 meterimik ungasitsigisumut inissinneqassapput.

Inuussutissarsiutiginagu kapisilinniarnernup aaqqissuussaanera

§ 12. Inuussutissarsiutiginagu kapisilinniarneq pisassiissuteqarnikkut ingerlanneqarsinnaavoq.

§ 13. Inuussutissarsiutiginagu kapisilinniarnermut, Naalakkersuisut ukiut tamaasa nunat tamalaat akornanni isumaqatigiissutit naapertorlugit kalaallit kapisilittassaannik aalajangersaassapput.

Imm. 2. Inuussutissarsiutiginagu kapisilinniarneq inuussutissarsiutigalugu kapisilinniarnernup aallarteqatigissavaa, § 7, imm. 2 naapertorlugu.

Imm. 3. Aalisarneq imm ulloq imm. 2-mi taaneqartoq sioqqullugu aallartissanngilaq.

§ 14. Kapisilittassiissutit aalajangikkat tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutiginagu kapisilinniarneq unitsinneqassanersoq. Nuna tamakkerlugu tusagassiutit aqqutigalugit nalunaarutigineqassaaq. Aalisarnermi atortut aalisarnerup unitsinneqarnissaa sioqqullugu qaqinneqassapput.

Inuussutissarsiutiginagu kapisilinniarnernit pisanik nalunaaruteqarneq

§ 15. Inuussutissarsiutiginagu kapisilinniarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilanngussaq 1 imaluunniit Sullissivik.gl aqqutigalugu pisassaaq. Kapisilinnik qassutiniq napittaajaanerup oqummersalluunniit atorlugit aalisarnerup kingornatigut, § 11, imm. 4 naapertorlugu nalunaarutiginninneq apuutereermermi

erngertumik uunga nassiunneqartassaaq: KANUAANA, Postboks 501, 3900 Nuuk, Telefax 34 63 60
imaluunniit e-mailikkut gflk@nanoq.gl.

*Inuussutissarsiutigalugu inuussutissarsiutiginalugu kapisilinniarnissamut akuersissutaatillit
nalunaaruteqarneq*

§ 16. Inuussutissarsiutigalugu inuussutissarsiutiginalugu kapisilinniarnissamut akuersissutaatillit tamarmik kapisilinniarsimangitsut tamanna pillugu ilanngussaq 1 atorlugu nalunaarutigissavaat.

Imm. 2. Inuussutissarsiutigalugu inuussutissarsiutiginalugu kapisilinniarnissamut akuersissutaatillit tamarmik kapisilinniarsimasut tamanna pillugu ilanngussaq 1 atorlugu nalunaarutigissavaat.

Imm. 3. Akuersissutinik atorneqanngitsunik aamma pisaqanngitsoornernik nalunaaruteqarneq nalunaarummut ilanngussaq 1 aqqutigalugu pissaaq. Nalunaaruteqarneq kingusinnerpaamik kapisilinniarnernerup matuneraniit ullut 14-init kingorna KANUAANA-mut, Postboks 501, 3900 Nuuk, Telefax 34 63 60 atorlugu imaluunniit e-mail gflk@nanoq.gl atorlugu nassiunneqassaaq.

Kapisillit kuuani kapisilinniarneq

§ 17. Kapisillit Kuuanniit kapisilinniarnermut pisassiissutit aamma ulloq aallartiffissaq pisassiissutillu ukiut tamaasa Naalakkersuisunit aalajangersarneqartarpoq.

Imm. 2. Kapisillit Kuuanni taamaallaat nammineq atugassanik aalisartoqartassaaq. Aalisarnermi tassani piumasaqaataavoq akuersissut qinnuteqareernermi Aalisarnermut Piniarnermullu Naalakkersuisoqarfimmit tunniunneqartassasoq.

Imm. 3. Imm. 2 malillugu aalisarsinnaanermut akuersissut qinnuteqartunut piumasaqaatinik makkuninnga naammassinnittunut tunniunneqarsinnaavoq:

1) Aalisarnek pillugu Inatsisartut Inatsisaanni § 8, imm. 1-imi piumasaqaatit.

2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq §§ 15 aamma 16 naapertorlugu naammassinnissimasunut.

Imm. 4. Kapisillit Kuuata paavani 1000 meter-imit qaninnerusumut qassuserneq inerteqqutaavoq.

Imm. 5. Kapisillit Kuuanniit 50 meterimik qaninnerusumi aalisarnermi atortut suulluunniit atorlugit aalisarnek inerteqqutaavoq

Imm. 6. Kuummi tatsinilu tassunga atasuni taamaallaat qissattaat ataasiinnarmik qarsorsalik atorlugu aalisartoqarsinnaavoq.

Imm. 7. Naalakkersuisut aalisarnerup qaqugu unitsinnissaa pillugu nuna tamakkerlugu tusagassiutitigut nalunaaruteqartassapput. Aalisarnek tamarmi tamatuma kingorna aalisakkat avalatseqqinneqartut pillugit nalunaaruteqartussaatsilluni pisaqarnertut avalatseqqiinertullu aalisartoqarsinnaaneranik aalajangiisinnaapput.

Imm. 8. Imm. 1 naapertorlugu aalisarnissap aallartiffissaa sioqqullugu aalisarnek inerteqqutaavoq. Imm. 7 naapertorlugu piffissap aalisarnerup unitsinneqarnerata kingorna aalisarnek inerteqqutaavoq.

Pineqaatissiissuteqartarneq

§ 18. § 1, nr. 1-2-mik, §§ 3-4-mik, § 5, § 7, imm. 3-mik, § 8-mik, § 9-mik, § 10, imm. 1-imik, § 11, imm. 1-imik, aamma imm. 3-mik, 4-mik, 5-imik, 6-mik aanna 7-imik, § 13, imm. 3-mik §§ 14-16-imik aamma § 17, imm. 2-mik, aamma imm. 4-mik, 5-imik, 6-imik, 7-imik, 8-mik unioqutitsineq Pinerluttulerinermik inatsimmi malittarisassat malillugit pineqaatitsisoqarsinnaavoq.

Imm. 2. Ingerlatseqatigiiffiit il.il. (Inatsisilerinermi immikkoortut inuttut isigineqarsinnaasut) Pinerluttulerinermi inatsimmi kapitel 5 naapertorlugu akisussaatinneqarsinnaapput.

Imm. 3. Pinerluttulerinermi inatsimmi arsaarinnittarneq pillugu malittarisassat taamatuttaaq atorneqarsinnaapput.

Imm. 4. Akiliisitsissutit Nunatta Karsianut pisassanngortinneqassapput.

Atortuulersitsineq

§ 19. Nalunaarut ulloq 1. august 2022 atuutilissaaq.

Imm. 2. Peqatigitillugu Namminersorlutik Oqartussat kapisilinniarneq pillugu nalunaarutaat nr. 33, 30. juli 2021-meersoq atorunnaarsinneqassaaq.

Namminersorlutik Oqartussat, ulloq 25. juuli 2021

Karl Tobiassen
Aalisarnermut Pininarnermullu Naalakkersuisoq

/ Jørgen Isak Olsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut

